

樂毅論

夏侯泰初

世人多以樂毅不時拔莒即墨為劣是以
叙而論之夫求古賢之意宜以大者遠者先
之必迂迴而難通然後已焉可也今樂氏之
趣或者其未盡乎而多劣之是使前賢失
指於將來不亦惜哉觀樂生遺燕惠王書其
殆庶乎機合乎道以終始者與其喻昭王
伊尹放大甲而不疑大甲受放而不怨是存大
業於至公而以天下為心者也夫欲極道之量務
以天下為心者必致其主於盛隆合其趣於先
王苟君臣同符斯大業定矣于斯時也樂
生之志千載一遇也亦將行千載一隆之道豈
其局蹟當時心於兼并而已哉夫兼并者
非樂生之所屑疆燕而廢道又非樂生之所
求也不屑苟得則心無近事不求小成斯
意兼天下者也則舉齊之事所以運其機

而動四海也夫討齊以明燕主之義此兵不
興於為利矣圍城而害不加於百姓此仁
心著於遐邇矣舉國不謀其功除暴不
以威力此至德全於天下矣邁全德以率
列國則幾於湯武之事矣樂生方恢大
綱以縱二城牧民明信以待其弊使即墨
莒人頽仇其上願釋干戈賴我猶親善
守之智無所之施然則求仁得仁即墨夫
夫之義也任窮則從微子適周之道也開
彌廣之路以待田單之徒長容善之風以
申齊士之志使夫忠者遂節通者義著
昭之東海屬之華裔我澤如春下應如
草道光宇宙賢者託心鄰國傾慕四海
延頸思戴燕主仰望風聲二城必從則
王業隆矣雖淹留於兩邑乃致速於
天下不幸之變世所不備敗於垂成時

運固然若乃逼之以威劫之以兵則攻取
之事求欲速之功使燕齊之士流血於二
城之間侈敘傷之殘示四國之人是縱暴
易亂貪以成私鄰國望之其猶豺虎
既大隋稱兵之義而喪濟弱之仁嚮齊
士之節廢廉善之風掩宏通之度棄王
德之隆雖二城幾於可拔霸王之事逝其
遠矣然則燕雖兼齊其與世主何以殊哉
其與鄰敵何以相傾樂生豈不知拔二城
之速了哉顧城拔而業乖豈不知不速
之致變顧業乖與變同由是言之樂生
不屠二城其亦未可量也

晉右軍將軍王羲之書樂毅論

貞觀六年十一月十五日中書令河南郡
開國公臣褚遂良奉

勅審定及排類

公元二〇〇八年元月十日於佛光山麓

王誠一恭書

宋人摹褚遂良樂毅論